


TEZAUUR LITURGIC
22 DECEMBRIE
+NICODIM RUSNAK,
MITROPOLITUL HARKOVULUI

SLUJBA
SF. IERARH
PETRU MOVILĂ,
MITROPOLITUL
KIEVULUI



HARKOV, 1996



Служба святителю Петру Могиле, митрополиту Киевскому

На малой вечерни

На Господи, возвах: стихиры на 4, глас 4.

Подобен: Званный свыше:

Священнейший храм Святаго Духа был еси, /
достохвальне святителю Петре, / рабе верный и
прилежный Господа Твоего, / от Негоже
преизобильно благодать приял и силу, /
Божественными Писаньми верныя утвердил еси,
/ Силою Духа Святаго, духи лукавыя
неизлагаеши, / не терпящия твоего запрещения,
Всеблаженне.

Яко грозд зрел, в точилех богословия достойно
сокровиществовал еси, достоблаженне Петре
отче наш / сие днесветлую звезду Святая
Церковь тя стяжа, / неведущим
неудобопостижная премудро уяснил еси, /
мечем веры еретичествоующих отражая
зломыслие, / оживотворяя стадо свое у
источницех Духа Святаго.

Умножив талант, его же от всех Творца приял
еси, / богатство сего расточил премудро, / сего
ради, в радость Господа твоего вшел еси
преславно. / Ныне же моли Всемилоостивого, от

гли и бед избавитися, / верою совершающим
всечестную память твою.

Слава, глас той же:

Просияша добрая дела твоя, яко солнце, / в
Церкве земной и Небесной, / угодниче Христов
Петре, трудолюбиво, / православно бо
проповедал еси истину и непорочную веру, /
юже, подвигом пастыря вернаго насаждал, / и
росою молитв слезных орошал изрядно, / да
прославляется Имя Божие в народе нашем во
веки.

И ныне: глас той же:

Тя, Богомати, предстательство имуще, / не
убоимся врагов ополчения, / сопротивляющихся
славящим из Тебе Рожденнаго, / Христа Бога и
Спаса нашего. / Его же моли, Всеблагая, мир
вселенней даровати / и спастися душам нашим.

На стиховне стихиры, глас 2:

Подобен: Доме Евфрафов:

Дом и селение Пресвятыя Троицы был еси, /
богодухновенне святителю Петре, / яко солнце
вселенную обходя, / благодатию просвещая
люди, / в вере Православной утвердятся.

Стих: Уста моя возглаголют премудрость, / и
поучение сердца моего разум.

Дом премудрости Божия, / еяже присно
наслаждаемся, / и веры истинный учитель, /

возвыси рог православных, / чтущих память
Твою преславно.

Стих: Блажен муж, бойся Господа, / в
заповедях Его восхощет зело.

Святителей преизрядная похвало, /
священником славо, / монашествующим
правило. / Церкви кормчий Богом данный, /
явился еси, достоблаженне Петре.

Слава, глас, подобен той же:

Лести лукавых / демонов посрамив / Креста
силою, / уяснил еси славу Христову, /
Святителю Петре.

И ныне, Богородичен, глас той же:

Приими ныне пение / людей Твоих,
Преблагословенная Мати, / и молящимся Тебе,
пречистая, / у Христа испроси от врагов
избавления, / еси бо Заступница народа нашего.

Тропарь, глас 5 (зри на велицей вечерни).

На велицей вечерни

Блажен муж: 1-й антифон. На Господи,
возвах, стихиры на 8.

Праздника 4, глас 8. Стихиры Святаго на 6.

Стихиры Святаго, глас 5:

Троица Безначальная и Единосущная / избра ты
от мятеж суетных воевод Молдавских, / быти

кормчем избранному стаду Христову, / Андреем
Первозванным провозвещенного / и
благочестивым Крестителем Владимиром
облагодатственного, / Священноначальнике,
Петре Богомудре, во еже просветити и спасти
достояние Его, / наследию вечного торжества: /
Ангелов и святых, Божиих избранных, / в них
же церковь земная, веселящаяся, ликовствует.
Веселися Киевская, Богом избранная
Митрополие, / Божия Матери вертограде
предивный, / псаломски възграйте, вернии
Матери градов Святой Руси, / воспойте песнь
хвалебную подвижницы Печерстии / и все
вверившиеся всеблагому Промыслу Божию, /
яко незабвена сотвори Господь пред Лицем
Своим, / пастыря и просветителя мудраго,
спасшего народы наша православныя, / от
пленения и порабощения духовнаго, / Святителя
Петра, благодати Духа Святаго
преисполненнаго.

Сошедшеся днесь вернии людие, / глубину
четыресталетия, аки день вчерашний,
вспоминающе, / восхвалим стража стада
православнаго недремлюща, / мужа
песнословца Богомудраго, / светильника веры и
ритора богословия неумолкающаго, / Дамаскину
и Роману песнопевцем подобна, / Петра, -
могилу сокровища некрадимаго.

Богомудре Святителю Христов Петре, / сияньми
Божественными делы твоими, / светильник
явился еси лучезарнейший, / в нихже
восхождения, яко лествицу, утвердил еси, /
худшее покоряя лучшему, / аки пчела, сот
сладоности Божественной верным собирая, /
медоварницы богословия неистоцимаго созидал
еси, / просветителю неутомимый, Отче наш! /
Темже, по успению Незаходимый Свет ты прият,
/ имже просвети братолюбием стези наша, пред
Лицем Господним.

Слава, глас той же:

Река, дарований духовных преисполненная, /
душ жаждущих - Божественное и пресладостное
питие, / излился из уст твоих, Святителю
Боголюбиве Петре, / имже верныя, аки земля
безводная, изрядно напаяются, / Троицу
Нераздельную, Едино Божество, благохвалити
научаются; / пламенем огненным святых молитв
твоих, / демонские силы от создания Божия
отступают, / храмы словесныя, в жилище Духа
Святаго очищаются. Ты же, небоявленному
Василию Великому по Бозе ревнуя, / к селениям
Небесным, в день кончины Его, призван был
еси, / отнюду же, яко страж Церкви Христовой
верный, / огради и спаси нас от жаждущих
поглотити души наши.

И ныне, Праздника: или Богородичен, глас 5.
Огнь Божества Христова, во утробе носила еси,
/ Его же ныне моли Пречистая, / распри в
народе нашем угасити, / на стези мира и
Боголюбия направить, / и, яко Божие
предначертание, / огня неугасимаго нас
избавити, / и светлости дня незаходимаго
сподобити, / егда приидет судити всяческая.

Вход, Свете тихий. Прокимен дня и чтение
Святительская 3.

На стиховне стихиры, глас 5:

Подобен: Радуйся:

Радуйся, священная главо, / Петре
Преблаженнейший, / Киевския Руси Богом
избранный печальниче, / в дни страшныя и
ужасныя народа ея, / судеб Церкви
Православныя крестоносителем избравшего тя.
/ Юже, Христу тезоименитую, зрел еси: / мечем
нечестивых посекаемую, / иноверными
всячески духовно истребляемую, / помощи же
ни единыя, нигдеже. / Ты же на помощь Божию
уповающе, / кротостию голубиной и мудростию
змииной / Церковь Православную победоносно,
утверждаеши, / в нейже имя твое
препрославлено во веки.

Стих: Священницы Твоя облекутся в правду, / и

преподобнии Твои возрадуются.
Радуйся, священная главо, / светлость мудрости
Господь в сердце твое вложи, / безвестная и
тайная Своя тебе яви, / еще на поле брани сущу,
/ от меча агарянского тя спасе. / Оружием
архиерейской благодати облече тя, / воина
Церкве Своей Святей изрядно утверди, / да
посрамятся пред лицом всех людей, /
готовивший сети уловления стаду твоему, /
сечением премудростию уст твоих, / поборниче
Христов Петре.

Стих: Моисей и Аарон во иереех Его / и Самуил
в призывающих Имя Его.

Радуйся, священная главо, / на острии меча
хитромудренно шествовав, / Церковь
Православную, возлюбленную свою, /
целомудренно пред нею хождше, / не
дремлюще, от лжеобольстителей прилежно
ограждал, / сокровище благодатного
Апостольского и Святоотеческого учения, /
посрамить и осквернить не попустил еси, /
мечем веры, бессмертной славой Сию увенчал, /
во иерарсех похвало непостыдная, / твердый
адаманте Христов, святителю Петре.

Слава, глас 8:

Богом предопределен / и мудрому Павлу ревнуя,
Церковь Христову всемудрыми твоими
Богонаставлениями украсил еси, / светильниче

веры, Петре, отче наш. / Писаньми твоими вся
просветил еси, / и яко плод зрел трудов твоих,
ко Христу привел еси. / Его же моли
прегрешений дати оставление, / любовь
празднующим святую память твою.

И ныне, Праздника, или Богородичен:
Безневестная Дево:

Тропарь, глас 5:

Богословия Божественных глубин / и учителей
Церкви Православны ревнитель
богодухновенный явился еси, / просветителю
народов наших, Петре Богомудре: /
сподвижника в ограждении Святаго
Православия преподобнаго Иова имея, /
торжество Церкви земныя Небесней уподобил
еси. / Сице бо, силою благодати Христовой
укреплен, / противу козни диавола вооружился
еси безбоязненно, / Ныне же, не премолчи ко
Господу: / благостоянию Церкви Православной
не поколебаться / и спастися Боголюбиву
народу нашему.

И ныне,
Праздника, или Богородичен: глас той же:

На утрени

На Бог Господь: Тропарь Праздника дважды,
Слава Святому: и ныне: Праздника, или
Богородичен, глас той же:

По 1-м стихословии, седален, глас 2:

Ко Господу пламенной любовью распалаяся, /
многия труды во утверждение Церкви
Православныя подъял еси, / якоже горлица
гнездо птенцам своим устилает, / Храмы Божия
и алтари святыя воздвизал еси, / в нихже
жертву Безкровную, в молитве слезной,
приносил еси, / мира и безмятежия пастве
своей у Владыки мира ходатайствовал, / яко
верный делатель винограда Христова, Петре,
отче наш.

Слава, и ныне,

Праздника, или Богородичен, глас той же:
Скорый Твой Покров и всеблагую помощь
покажи на рабех Твоих, / и обуреваемые волны
воздвигшийся на ны, укроти, Пречистая, / и
подаждь мир Боголюбивому народу нашему, /
да ублажим Тя, спасающую от бед, род
христианский.

По 2-м стихословии, седален, глас 4:

Якоже жезл Ааронов, процветши, священство
утверди, / тако бо, богатством благодати Духа

Святаго, / просияша добрая дела твоя,
всеблаженне Петре, / имиже древо Киевския и
Галицкия Руси, неувядаемо, / четыресталетний
плод жизни приносит. / Ты же, назабвенно
вознеси молитвы ко Господу, / во еже избавити
нас озлобления лютаго, / да не падше,
посраммимся в день грознаго испытанія.

Слава, и ныне, Праздника, или Богородичен:
Глаголом Твоим Богодухновенным, Отроковице,
последующе, / Тя блажим вси роди, Дево, / яко
Бога Блаженнаго Блаженную бывшую
Родительницу, / песнословно величаем.

Полиелей. Величание святительское:

По полиелеи, седален, глас 1:

Подобен: Гроб Твой:

Веселися граде Кіеве, / торжествуйте все
православные люди, / днесь бо, яко
светлоблистательная звезда, / память святителя
Петра - ратоборца Христова, / на тверди
Церкви Христовой просия, / юже мы
всерадостно совершающе, вопием: / утверди,
Святе, Святую Православную веру, / и
прощения грехов наших испроси, / да
воцарится мир и благоденствие в державе
нашей.

Слава, и ныне, Праздника, или Богородичен:
Безневестная Чистая Богородице Дево, / Едина
верным Предстательнице и Божественный
Покрове, / бед, и скорбей, и лютых обстояний
свободи, / иже на Тя надежду, Отроковице,
имущих, / всячески согрей и Матерне укрепи, /
и спаси души наша Божественными Твоими
молитвами.

Степенна, 1-й антифон 4-го гласа.

Прокимен, глас 4:

Священницы Твоя облекутся в правду, / и
преподобнии Твои возрадуются.

Стих: Услышите сия вси языцы, внушите вси,
живущий по вселенней.

Всякое дыхание:

Евангелие Святительское.

По 50-м псалме стихира, глас 6:

Духа Святаго благодать / в твоих устнах
излияся, отче, / и был еси пастырь Христовы
Церкве, / уча словесныя овцы, люди твоя, /
веровати в Троицу, во Едино Божество.

Канон Праздника, или Богородицы на 6,
и Святителя на 6.

Канон Святителя, глас 7.

Песнь 1

Ирмос: Поспешествовавшему Богу во Египте
Моисееви, / извести Израиля, / Тому Единому
поим, яко прославися.

Припев: Святителю отче Петре, моли Бога о нас.
Егда, яко воин полков христианских, в граде
Хотине, / веру Православную от орд
бусурманских защищал еси, / Господь, видя
твою ревность воином Церкви Своея Святыя тя
избра, / Егоже моли, Всеблаженне, / сохранить
Ю адовыми враты непреодолиму.

Иго благое и бремя легкое подъял еси, Петре
Богомудре, / егда славу бояр Молдавских
отринув, / образ Ангельского жития, в
вертограде обители Печерския восприял, / да
облечешися во образ мужа Христова.

Пламенем неугасимым Духа Святаго, / яко
порфирию златотканою, ума красотою
Божественною просиял еси, / воине Церкви
Христовой, Петре, / тьму лжеверия в Киевской и
Галицкой Руси, / паче луч солнечных, опалив
премудро.

К чаши Премудрости Божественныя уста твоя
приложив, / источник питания спасительнаго в
душе твоей отверзл еси, Святителю Петре, / от
негоже напой струями любви Христовой сердца
наша, / молим тя.

Богородичен: Подаждь, Владычице, свыше
победу на борюция нас, / ищущих опустошения
Церкви Православныя, / Тебе бо едину
Заступницу имамы, / яко да, спасаемы Тобою,
прославим Тя, / Христа Бога нашего, Пречистую
Матерь.

Песнь 3

Ирмос: Утвердися сердце мое в Господе, /
вознесся рог мой в Бозе Спасе моем, /
расширишася на враги моя уста моя, /
возвеселихся о спасении Твоим.

От лозы доброплодная, воевод молдавских,
гроздь сладок произшел еси, Петре Богомудре, /
иже из корене их, святитель Георгий доброе
семя в сердце твое вложи, / преславно
процветшее в вертограде гор Киево-Печерских.
Искусен в житии земному воинству, / на
супостаты победы многия совершив, / и во
иноцех суше, смирением и молитвою полки
бесовския победил еси, Петре прехвальне, / в
обоих бранех непобедим явился еси, преславно.
Всесветлую звезду показа тя, Церкви
Зиждатель, / неугасимый светильниче Петре. /
Светлостию добродетелей и златозарных учений
твоих, просветишася народы словенским, /
славно преумноживший делания твоя, чтущим
память твою достохвально.

Благодать Святаго Духа, / миро благоухания
Божественнаго излия на тя, / егда возложением
рук святителей Церкви на главу твою,
архипастырем престольнаго златоглаваго Киева
проручествовавшие тя.

Богородичен: Невестная Богородице, Госпоже
и Владычице, молим Тя прилежно, / Твоими и
Святителя Петра молитвами, / стадо
православное умиротворите, / да славится Имя
Божие непрестанно в земле нашей.

Седален, глас 3.

Подобен: Божественныя веры:

Делы твоими просиял еси, яко денница, /
благочестие веры Православныя, знамением
Андрея Первозваннаго утвердив, / кладязи
словесных знаний, познавати величие дел
Божиих, / яко пастырь недремлющий, юным
отроком учредил, / сие бо, прославляти Бога во
святых Своих, всяческая научил, / Темже, днесъ
память творяще, вопием ти: / Моли Всещедрого
Бога, спаситися душам нашим.

Слава, и ныне,

Праздника, или Богородичен: глас той же:
Ты крепость наша, Похвала и Радование, /
Заступление, и Прибежище, / и
Предстательница непобедимая, / и
Хранительница от лютых наветов диавола,

Пресвятая Богородице, / помози нам в вере не поколебаться, Ангелам и Святым на утешение.

Песнь 4

Ирмос: Небеса прорекла есть / добродетель Твоя, Господи, / и Твоего хваления вся исполнил еси. / Слава силе Твоей, Человеколюбче.

Святителю преславный Петре, / ты оружие обрел истинное, сущее благочестия первоначальник, / серпом учений твоих, плевелы злочестия, из кореня посекал еси, / любоблезненно ограждая от бед возлюбленную паству свою.

Поборниче веры явлься, / Христову Церковь, непленену борением лжеучителей сохранил еси, / стрелами словесными, учение нечестивых Богомудренно низложив. / Помози и нам, немощным, в вере непоколебаться.

Умом очищенным предстоя пред Лицем Божиим, / пламенем молитв твоих, противу губителей душ человеческих ополчился еси, / и, якоже молния под небесем, демонския силы поражал еси неустрашимо. / От нихже защити души наша в день Судный.

Не умом льстивым, но чистотою сердца и телесным воздержанием, приобрел еси благодать премудрости и силу противу козней диавольских стати, / якоже великий Архистратиг иногда, /

да сокрушится сатана и клеветы его, под ногами на помощь ты призывающих.

Богородичен: Световиден столп, огненный и облак светел, / предводящ к Небесному наследию, Богородице Чистая, / буди народу нашему православному, Мати Божия, / в пустыни жития заблужденному.

Песнь 5

Ирмос: Утренюет дух мой к Тебе, Боже, / зане Свет еси, / и Твоя повеления быша исцеления рабом Твоим, Человеколюбие.

Яко воин на страже, утреневал еси святителю Христов, Петре, / и яко елень, стадо свое к источнику вод предводящий, / дремания веждама твоима не давал еси, / пекшися о спасении паствы своея, / в поте чела пития и пиши духовныя иский.

Христова розга Богонасажденная, / на кафедре святителей Киевских плод мног оплодоносил еси, Петре, отче наш, / имже и ныне чада Божий питаются изобильно. / Сокровищу сему не попусти оскверниться, богомерзкими лжеученьми.

Просвещение спасительнаго проповедания, / якоже струя из камене Моисеева, излися из медоточных уст твоих, / Учителем Словенским подобяся, / како просветити народы наша, /

имже, воистину, свет немеркнущий явился еси, Всеблаженне.

Всецело, яко жертва живая, Христу сораспялся еси, / святителю Божий Петре, / со страждущими страждущь, с плачущими - плачущий был еси воистину. / Сего ради, яко жертва Илиина, быша прошения твоя ко Господу, за всех и за вся.

Богородичен: Услыши, Богородице, нас, вопиющих Ти и славящих Твое величие, / и избави нас от бед, грядущих на ны, / и настави нас творити волю Сына Твоего и Бога нашего, / и чаемых мук свободи нас, молим Тя.

Песнь 6

Ирмос: Иона из чрева адова вопиюще: / возведи от тли живот мой. / Мы же Тебе вопием: / Всесильне Спасе, помилуй нас.

Препояса тя, Владыка Христос, мечем духовным / и научи тя подвизатися к одолению раздоров в Его Святей Церкви, / верный друже Христов и огненное слово вложи во уста твоя, / во еже посрамити пагубную лесть, сеятелей плевелов на ниве Христовой.

Обрел еси неудобь обретаемое древле и ныне богатство, / в немже Христа, Божию Силу, и Божию Премудрость преобрел еси, Всеблаженне. / Богатством сим некрадомым, и нашу нищету

обогасти, / во еже не уподобитися нам
смоковнице бесплодной.

Святительства правило святителем показался,
Воплощшагося Слова верный благовестниче,
Петре Богоглаголиве, / многия люди и отроцы
же безсловесия избавил еси, / богословия
сладость вложил еси в сердца их, тя чтущих, /
Имя Божие прославляюще.

Светильника мысленно пресветла получивше тя,
/ веселимся, Божественною бо верою тобою
просвещаемы, / сынови Света и истины
наследницы, / твоими молитвами, отче
преблаженнейше, тщимся удостоитися.

Богородичен: Лютыми грехми обуреваемые и
напастей бедами потопляеми, / под
Божественный покров Твой прибегаем, Мати
Христа Бога нашего. / Молися, Благосердная, во
еже спастися рабом Твоим.

Кондак, глас 3.

Яко вертоградарь трудолюбием уязвлен, /
цветник святой Руси ученьми твоими благоухал
еси, / молитвами подвижников Печерских
изрядно укрепляем, / алчущих и жаждущих
правды, / от Источника воды живья, обильно
напаяяй; / Корабль Церкви Православныя,
волнами житейского моря обуреваемый, / от
порабощения и духовного потопления, спасл еси,

сосуде Духа Святаго, священнотаинниче Петре.
/ Внемли ныне мольбам паствы твоея, / во еже
не разоритесь ей ученьми еретическаго зловерия
и неистовством расколов злочестивых, /
молитвами твоими за ны ко Господу.

Икос.

Святительскою одеждою одеян / и благодатию
Духа Святаго укрепляем, / жребий кормчего
Церкви Христовой восприял еси, Всеблаженне, /
весь Христу любовь сраспинаяся. / Крест,
многострадальнаго народа нашего, на рамена
своя возложив, святителю Христов Петре. /
Сице, ревностию пастыря добраго утренююще,
светом Боговедения верныя озаряя, / верою
бдяще, ложная учения и хитросплетения, яко
плевелы на ниве Христовой, евангельски
попалил еси, / слово спасительныя Истины
всему миру возвещая, / Просветителям
Словенским последовал прилежно. / Ныне, о
Всеблаженне, внемли горестем нашим, / в них
же сам искушаемый был, молитвами Твоими за
ны ко Господу.

Песнь 7.

Ирмос: В печи суще халдейстей, / Авраамстии
отроцы, / ликовашу со Ангелом, глаголюще: Отец
наших Боже, благословен еси.

Якоже Соломону иногда, излился благодать во
устне твои свыше, / и расшири сердце твое, о
священне Петре, / во еже возлюбити благолепия
славы дому Божия, / в нем же песнословити
Имя Господне возлюби душа Твоя.

Воспламени, всеблаженне Петре, / сердца наша
горением любви ко Господу, / и к подвигу
благоразумия стопы наша направи. / Не имамы
бо покаяния, ни жития непорочнаго, ниже
молитвы чистыя, / сего ради помози нам.

Призри человеколюбиво, Петре, / на люди твоя,
прегрешеньми обуреваемых и злобою
снедаемых, и потщися спасти, да
непокаявшийся, опалит нас огонь содомский.

Трудолюбный Богосажденнаго вертограда
делателю, Петре преблаженне, / ороси теплыми
слезами молитв твоих виноград, егоже
всеусердно насаждал еси, / да тля греховная не
растлит достояние, егоже Богу уговоряя еси,
прилежно.

Богородичен: Ублажают Тя, Богородице, всяк
возраст и всяка душа верных: / Божие бо Слово
паче ума и слова родила еси, / во спасение душ
наших, Пренепорочная.

Песнь 8.

Ирмос: Единого Безначальнаго Царя Славы, /
Егоже благословлят Небесныя силы и трепещут

чины Ангельстии, / пойте священницы, людие,
превозносите Его во веки.

Веры Православныя поборника, / благочестия
учителя, святителей украшение, / христиан
наставника, нищих помощника и питателя, /
недугующих сострадальца, храмов Божиих
строителя премудра, / восхвалим днесь, верные,
Петра достохвальнаго.

Жертву Безкровную за люди принося, / весь
любовию Христу сраспинался еси, / не в крове
тельчей и козлей, якоже Аарон в Скинии иногда,
но Кровию Христовою освящал еси люди, /
святителю Петре препрославленный.

Венценосец явился еси, святителю Петре, / яко
уготовася тебе небесное жилище, идеже Скиния
Бога с человеки, / да ходатайствуеши за нас,
чад твоих, / приносяще владыке мира фимиам,
молитвы благоухания.

Славившу ти во всем животе твоём Троицу
Трисвятую, / Несозданную, песнословля
Триедино Божество. / Ныне со Ангелы и всеми
святыми, поеши Той: / Слава Тебе, Боже,
отверзшему земнородным Райския селения.

Богородичен: Скиние Богопрославленная,
радуйся Богоневесто, радости Ангелов и
святителей красото, / радуйся, Вратарнице
Небесная, радуйся верных спасение, радуйся,

Пречистая, отчаянных от рова погибели
похищающая.

Песнь 9.

Ирмос: Паче естества Матерь / и по естеству
Деву, / едину в женах Благословенную, /
песнями, вернии, Богородицу величаем.

Возрастив талант благодати, имже украси тя
Владыка живых и мертвых, / к Нему же
радостно преставился еси, / яко воевода
победоносный, глаголя, Возлюбившему тя: / се
принесох Ти дарование преумножено. / Темже,
яко благий и верный раб, вшел еси в радость
Господа своего.

Зриши ныне сладкого Иисуса лицом к лицу, /
Егоже прежде в зеркале гаданий зрел. /
Наслаждайся убо, святе, възыграй и ликуй, /
приобщаяся ныне Возлюбленного тобою, / и нас,
почитающих тя, поминай.

Радуйся ныне радостию, воистинну
бесконечною и неизреченною, Петре
преблаженне, / идеже селение Божественной
радости; / победив бо zde временное, утешайся
и веселися вечно радостным и блаженным
веселием на Небесе.

Рукою моею недостойною приносимое тебе, / в
нищете духа, хваление, святителю Петре, / не
презри, но приими и моли Творца и Владыку

избавити мя вечнаго мучения, тебе верою почитающа.

Богородичен: Пощади, Боже, наследие Твое, / грехи наша вольная и невольная презрев, прости, / на сие имея молящую Тя, на земли безсеменно Тебе рождшую, Безневестную Твою Матерь.

Светилен:

Видев Господь чистоту твоего сердца, / юже имел еси от юности твоя, / сего ради от отечества твоего, путь в стольный град Киев указывает ти, Петре Богомудре, / во еже просветити и утвердити в вере православной народы наша, / во славу Его Божественных величий. / Егоже моли непрестанно о всех нас, верных чад твоих.

Слава, и ныне, Праздника, или Богородичен: Свет рождшая, Чистая, / просвети очи душ наших, / да не постигнет нас глубочайшая тьма греховная, ниже глубина отчаяния покрывает нас, / но спаси нас и окорми, Богородице, / светозарному Божественному пристанищу.

На хвалите стихиры на 4, глас 6.

Днесь красуется град Киев, / горы и холмы Днепровския възиграша о святых своих, / псаломски ликовствуют иноцы Печерскийи, /

страна Молдавская молитвы своя возносит, / и
вся Православная Церковь верою торжествует, /
совершающе святую память твою, святителю
Петре, / блистанием подвига твоего людие в
братолюбии утверждаютя, / православно
славяще Троицу Единосущную и Нераздельную.
Приидите ныне, благоименити соборы, /
псаломски воскликнем Господу, Богу нашему, /
призри с небесе, Боже и виждь, / и утверди
Святую Православную Церковь, / о ней же
святитель благоверный Петр, молит Тя: /
"Незыблемо основание Церкви Твоей
положивый, Христе Царю, и еже адовыми враты
не одолетися Ей, неложно обещаваый, / от
нынешних еретических бед избави Ю, / со
слезами многими молим Тя, / Юже искупил еси
честною Твоею Кровию".

Якоже маслину изрядно плодовитую, /
Светодавец Христос яви тя учителя народу
нашему, / и чашу премудрости в уста твоя
вложи, / просветителю и Святаго Православия
поборниче, Петре, / от неяже питие разума
духовного источающего; / имже, бояре и
вельмози, иноцы и Боголюбивые люди
напояхуся, / и все народы златоглавый Киев
посещающия, / чудодейственно, миром глав
мироточащих исцеляющесея, / едиными усты и
единым сердцем Бога прославяху, / союзом

любви Христовой связуемы, / порфирию
братолюбия украшахуся.

Слава, глас 8.

Троицы поборниче преславный, / защитниче
Святаго Православия непобедимый, / державы
же бесовския низложителю, / помози нам мечем
веры вооружитися, / и надеждою несумненною,
/ отчаяния губительнаго избавитися; /
молитвами твоими и Креста силою, /
развергшиися хлябе адова - козни блудоверов
победити, / верою чистою, яко светильником
путеводным, / совершенства любви достигнута,
/ тебе бо дадеся благодать / спасти от бед
души наша, / святителю Петре, отче наш!

И ныне,

праздника, или Богородичен, глас той же:
Владычице, прими молитвы раб Твоих / и
избави нас / от всякия нужды и печали.

Славословие великое, и отпуст.

На Литургии

Блаженны от канона песни 3-я Праздника и
святаго 6-я.

Прокимен, глас 7: Честна пред Господем смерть
преподобных Его.

Стих: Что воздам Господеви о всех, яже воздате

ми?

Апостол ко Евреем, зачало 335.

Аллилуия, глас 4: **Воззваша правднии, и Господь услыша их.**

Стих: **Многи скорби праведным:**

Причастен: **В память вечную будет праведник:**

[Текст великобденной службы святому Петру (составленной митрополитом Харьковским Никодимом) воспроизводится по изданию:

Митрополит Никодим Руснак. Сборник служб и акафистов. Харьков: «Прапор», 1996. Стр. 329-337]

